

Museo Historico y Cosecha a uni pa trece ofishi di antaño bek



ORANJESTAD - Tanto Fundacion Museo Arubano cu ta maneha Museo Historico como Fundacion CRAFT cu ta maneha Cosecha ta cla pa start cu dos tayer masha interesante riba vlechtmento. Un di e tayernan ta basico di un dia y e otro ta profesional cu ta dura 3 siman. E ta destina specialmente pa tur esunnan interesa den siña of avansa den tecnica moderno di vlecht.

E idea tras di trece ofishi nan di antaño bek a cuminsa ora cu Fundacion Museo Arubano hunto cu Fundacion CRAFT a uni bou capa di Museo Historico y Cosecha den un esfuerzo pa trece ofishi nan di antaño bek y educa comunidad riba esaki. E prome ofishi cu lo cuminsa cun'e ta esun di vlecht sombre.

Ta trata aki di un ofishi masha bieu mes, eherce na Aruba entre año 1900 pa 1920. E tempo ey a recluta mas o menos 160 mucha muhe jong pa siña e ofishi di vlecht sombre di stro y asina a crea un industria nobo pa nos isla. Ta bon pa informa cu entre 1902 pa 1920, vlechtmento di sombre tabata e di dos industria cu a genera mas entrada pa Aruba, despues di esun di cunukero.

Sombrenan traha na man y exporta, conoci awendia como e "Panama Hat" a produci un averahe di 112 mil

florin den año 1912. E sombre a haya e nomber di "Panama Hat" pasobra e tempo ey, y ainda, Panama ta e centro for di unda ta exporta tur e sombrenan aki pa bende cu mundo henter. Na año 1924, ora cu refineria Lago a habri su portanan, mesora a nota un caida den trahamento di sombre y pa despues nos a cuminsa importa cla caba.

Vlecht ainda ta un ofishi bibo den tur cultura y por nota su influencia rond, por ehempel den un hamaca, sombre, armband, muchanan ta vlecht scooby doo, etc. Cu esaki ta obvio cu vlechtmento ta sigui bibo y ta pasa di generacion pa generacion.

Museo Historico Arubano ta planeando pa lansa un exposicion grandi den luna di Maart den tres sala di henter e museo, unda lo repasa e historia di vlechtmento di sombre cu a cuminsa 5 mil año pasa na Ecuador, repasa e influencia di vlechtmento den comunidad y tambe hunto cu artistanan local demostra con vlechtmento ta bibando ainda den arte.

Cu esaki den mente, Museo Historico ta buscando famia, conoci nan of hendenan grandi cu conoce historia di vlechtmento na Aruba pa por entrevistanan pa haya potretan y otro material cu ta importante pa nos conserva e historia di vlechtmento di sombre entre año 1900 pa 1920. Pa mas informacion por bel 5885199 puntra pa Joasy

of Vallery pa asina por bishita bo y entrevista Bo pa logra acumula mas informacion posibel.

Museo Historico y Cosecha, anticipando e exposicion riba vlechtmento di sombre y pa por educa nos hendenan riba e ofishi aki, a atrae un artista vlechtido profesional for di Hulanda, experto den vlechtmento cu stro, pa duna un tayer. Asina ta invita artistanan, docentenan, artistanan of publico interesa den siña e tecnica di vlecht, pa participa y inscribi na e tienda di Cosecha, den e edificio monumental color geel situa na Zoutmanstraat # 1, dilanti Kerki Protestant na Playa.

Ta ofrece "Masterclass" cu ta 2 bes pa siman, un total di mas o menos 7 pa 8 ora di curso pa siman durante 3 siman largo, cu e experto Hulandes.

Tambe ta ofrece e curso basico di un dia, di entre 4 pa 5 ora, den cual ta duna e base di e tecnica di vlecht. Aki lo siña interesadonan a diferencia, den por ehempel vlecht cabey cu vlecht un armband, te na traha algun obra.

Asina ta rebiba un di e prome ofishi nan di nos isla, vlechtmento di sombre, den cual e generacion nobo lo siña con tabata haci'e antes y con por haci'e awendia uzando tecnica nan nobo y moderno. □